

## **UPRAVNI ODBOR**

Uspostavljen Zakonom o sistemu indirektnog oporezivanja  
u Bosni i Hercegovini

Na osnovu člana 14. stav 3. Zakona o sistemu indirektnog oporezivanja u Bosni i Hercegovini ("Službeni glasnik BiH", br. 44/03 i 52/04) i člana 146. stav 3. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", br. 63a/04 i 60/06), Upravni odbor Uprave za indirektno oporezivanje, na 94. sjednici održanoj 28.11.2008. godine, donio je

### **O D L U K U**

#### **O TROŠKOVIMA PREGLEDA ROBE IZVAN MJESTA RADA I IZVAN RADNOG VREMENA CARINSKOG ORGANA**

##### **Član 1.**

(Predmet)

Ovom Odlukom utvrđuje se iznos i način plaćanja troškova pregleda robe koji se vrši van mjesta u kojem carinski organ redovno obavlja carinjenje robe i troškova pregleda robe koji se vrši van redovnog radnog vremena carinskog organa.

##### **Član 2.**

(Pojam mjesta u kome carinski organ  
redovno obavlja carinjenje robe)

U smislu ove Odluke, pod mjestom u kome carinski organ redovno obavlja poslove carinjenja robe smatraju se prostorije i prostori u kojima carinski organ (carinska ispostava i carinski referat) redovno vrši carinski nadzor, kontrolu ili carinjenje robe, zatim javno carinsko skladište tipa F i javno carinsko skladište tipa A koje je smješteno uz prostorije ili prostor u kojem carinski organ vrši nadzor, kontrolu ili carinjenje robe.

##### **Član 3.**

(Vrsta troškova)

Troškovi iz člana 1. ove Odluke obuhvataju troškove Uprave za indirektno oporezivanje nastale u vezi izlaska carinskog službenika radi pregleda robe van mjesta u kome carinski organ redovno obavlja carinjenje robe i troškove pregleda robe van redovnog radnog vremena carinskog organa (u daljnjem tekstu: troškovi rada), te troškove prijevoza carinskog službenika od radnog prostora carinskog organa do mjesta rada i nazad (u daljnjem tekstu: troškovi prijevoza).

#### **Član 4.**

(Visina i način plaćanja troškova)

(1) Troškovi rada iz člana 3. ove Odluke određuju se u visini od 40,00 KM za svaki sat rada jednog carinskog službenika, pri čemu se svaki započeti sat rada računa kao puni sat.

(2) Troškovi prijevoza iz člana 3. ove Odluke određuju se u visini stvarno nastalih troškova ako se prijevoz obavlja sredstvom javnog saobraćaja, a ako se prijevoz obavlja službenim vozilom Uprave za indirektno oporezivanje troškovi prijevoza se određuju u visini od 20% od iznosa cijene jednog litra odgovarajućeg goriva po prijeđenom kilometru.

(3) Troškove iz stava (1) i (2) ovog člana snosi deklarant, a uplaćuju se na Jedinstveni račun Uprave za indirektno oporezivanje - II grupa računa prema Odjeljku II tačka 2. i Aneksu VI Pravilnika o uplaćivanju indirektnih poreza i ostalih prihoda i taksi koje naplaćuje Uprava za indirektno oporezivanje ("Službeni glasnik BiH", broj 99/07).

(4) Po obavljenom pregledu robe, carinski organ odmah, a najkasnije sljedećeg radnog dana sačinjava obračun troškova iz stava (1) i (2) ovog člana, te o obračunatim troškovima, iz programa "Račun" (kontrolnik 7), izdaje račun (fakturu) i uručuje ga deklarantu, uz dostavnicu. Jedan primjerak računa carinski organ zadržava u službenoj evidenciji. Plaćanje iznosa troškova po izdatom računu prati Odsjek za poslovne usluge regionalnog centra kojem organizaciono pripada carinski organ koji je obavio pregled robe.

#### **Član 5.**

(Prestanak važenja ranijih propisa)

Danom stupanja na snagu ove Odluke prestaje da važi Naredba o tarifi troškova uredovanja carinskog djelatnika izvan uredovnog prostora ("Službene novine Federacije BiH", broj 11/96) i Odluka o tarifi troškova izlaska carinskog radnika radi smještaja robe pod carinski nadzor i carinjenje robe van mjesta, odnosno prostorija ili prostora u kojima carinarnica vrši carinski nadzor i carinjenje robe ("Službeni glasnik Republike Srpske", broj 10/93).

#### **Član 6.**

(Stupanje na snagu)

Ova Odluka stupa na snagu osmog dana od dana objavljivanja u "Službenom glasniku BiH".

**Broj: UO 2811/107/08**  
**Datum, 28.11.2008.**

**Predsjednik Upravnog odbora**  
**Dragan Vrankić**